

**Broj: UP1-06-13-1-40-1/23**  
**Mostar, 10.03.2023. godine**

Na osnovu člana 21. stav (1) tačka 9), člana 37., člana 84. stav (3) i člana 87. stav (2) Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13, 94/15, 54/19, 1/22 i 61/22), člana 10., člana 20. stav (1) i člana 23. stav (1) Statuta Regulatorne komisije za energiju u Federaciji Bosne i Hercegovine („Službene novine Federacije BiH“ broj 24/14 i 91/15), člana 8. stav (1), člana 32. stav (4) i člana 46. Poslovnika o radu Regulatorne komisije za energiju u Federaciji Bosne i Hercegovine („Službene novine Federacije BiH“ broj 29/14, 31/16 i 84/19), člana 78. Pravilnika o javnim raspravama i rješavanju zahtjeva, sporova i žalbi („Službene novine Federacije BiH“ broj 57/12, 71/14 i 31/16), člana 38., člana 42. stav (1) tačka b) i tačka c) i člana 43. stav (2) Pravilnika za izdavanje dozvola („Službene novine Federacije BiH“ broj 2/17, 39/20, 82/21 i 1/23), člana 17. i člana 21. tačka a) Pravilnika o sticanju statusa kvalifikovanog proizvođača električne energije („Službene novine Federacije BiH“ broj 53/14), člana 9a. Pravilnika o metodologiji i načinu obračuna regulatornih naknada za imaoce dozvola – Pročišćeni tekst („Službene novine Federacije BiH“ broj 94/19 i 1/23), postupajući po službenoj dužnosti u postupku oduzimanja Dozvole za rad za proizvodnju električne energije broj 06-03-580/22/14 imaoce dozvole „EKO-SAN“ d.o.o. Sarajevo, Geteova ul. br. 6, Sarajevo, zastupanog po zakonskom zastupniku Samiru Hamziću, Regulatorna komisija za energiju u Federaciji Bosne i Hercegovine – FERK je 10.03.2023. godine na V redovnoj sjednici donijela sljedeće

### **R J E Š E N J E** **o oduzimanju dozvole**

1. Imaocu dozvole „EKO-SAN“ d.o.o. Sarajevo oduzima se Dozvola za rad za proizvodnju električne energije broj 06-03-580/22/14, izdata Rješenjem broj 06-03-580-17/22/14 od 08.12.2014. godine, sa periodom važenja od 08.12.2014. godine do 07.12.2024. godine.
2. Oduzima se „EKO-SAN“ d.o.o. Sarajevo status kvalifikovanog proizvođača u objektu solarne fotonaponske elektrane „O.Š. Meša Selimović“ i objektu solarne fotonaponske elektrane „Bijela ploča“, utvrđen Rješenjem broj 06-03-580-17/22/14 od 08.12.2014. godine.
3. Imalac dozvole iz tačke 1. ovog rješenja obavezan je platiti regulatornu naknadu za 2023. godinu za period važenja dozvole za rad u 2023. godini u iznosu od 55,89 KM.
4. Ovo rješenje je konačno, te se objavljuje na oglasnoj tabli i internet stranici FERK-a, a dispozitiv ovog rješenja u „Službenim novinama Federacije BiH“.
5. Stupanjem na snagu ovog rješenja prestaje važiti Rješenje broj 06-03-580-17/22/14 od 08.12.2014. godine, kojim je izdata Dozvola za rad za proizvodnju električne energije broj 06-03-580/22/14.

### **O b r a z l o ž e n j e**

Članom 21. stav (1) tačka 9) Zakona o električnoj energiji u Federaciji Bosne i Hercegovine propisano je da je nadležnost FERK-a izdavanje, obnova, prenos ili oduzimanje dozvola za proizvodnju, distribuciju, snabdijevanje, trgovinu električne energije i operatora za obnovljive

izvore energije i efikasnu kogeneraciju. Članom 84. stav (3) Zakona propisano je da je imalac dozvole dužan ispunjavati obaveze utvrđene dozvolom za rad, dok je članom 87. stav (2) Zakona propisano da FERK izdaje, obnavlja, prenosi ili oduzima dozvole za rad u skladu sa procedurama propisanim posebnim aktima FERK-a, poštujući princip hitnosti postuka.

Članom 38. Pravilnika za izdavanje dozvola propisano je da se postupak obnove, izmjene i dopune, prenosa i oduzimanja dozvole za rad može pokrenuti na zahtjev imaoaca dozvole i na vlastitu inicijativu FERK-a, dok je članom 42. stav (1) tačka b) i tačka c) istog pravilnika propisano da FERK može oduzeti dozvolu za rad ukoliko imalac dozvole ne poštuje uslove i rokove utvrđene dozvolom za rad i ne pruža FERK-u zahtjevane informacije i podatke u periodu važenja dozvole za rad neophodne za obavljanje poslova iz nadležnosti FERK-a. Također, članom 43. ovog pravilnika propisano je da se postupak obnove, izmjene i dopune, oduzimanja i prenosa dozvole, osim prenosa dozvole za rad iz člana 41. stav (1) tačka a) pravilnika, vodi na isti način kao i postupak izdavanja dozvole, ali i da ukoliko su u zahtjevu za pokretanje postupaka navedene činjenice ili podneseni dokazi na osnovu kojih se može utvrditi stanje stvari ili ako se to stanje može utvrditi na osnovu opštepoznatih činjenica ili na osnovu službenih podataka kojima FERK raspolaže, ovi postupci se mogu provesti i donijeti odluka o podnesenom zahtjevu bez održavanja javne rasprave.

Članom 17. Pravilnika o sticanju statusa kvalifikovanog proizvođača električne energije propisano je da se obnova, prenos i oduzimanje statusa kvalifikovanog proizvođača pokreće na zahtjev kvalifikovanog proizvođača, dok se oduzimanje statusa kvalifikovanog proizvođača može pokrenuti i na inicijativu FERK-a, kao i da se postupak obnove, prenosa i oduzimanja statusa kvalifikovanog proizvođača vodi na isti način kao i postupak sticanja statusa kvalifikovanog proizvođača, odnosno u skladu sa članovima 9., 10., 11., 12. i 14. tog pravilnika. Članom 21. tačka a) istog pravilnika propisano je da FERK može oduzeti status kvalifikovanog proizvođača u slučaju ako se kvalifikovanom proizvođaču oduzme dozvola za rad za proizvodnju električne energije.

FERK je Rješenjem broj 06-03-580-17/22/14 od 08.12.2014. godine izdao imaoocu dozvole „EKO-SAN“ d.o.o. Sarajevo Dozvolu za rad za proizvodnju električne energije broj 06-03-580/22/14. Tačkom 3.1. navedene dozvole propisano je da je imalac dozvole ovlašten obavljati djelatnost proizvodnje električne energije u proizvodnim objektima solarna fotonaponska elektrana „O.Š. Meša Selimović“ (Grad Sarajevo, opština Novi grad Sarajevo) instalisane snage 27,6 kW AC (26 kWp DC) i predviđene godišnje proizvodnje 28,4 MWh i solarna fotonaponska elektrana „Bijela ploča“ (u naselju Bijela ploča, opština Maglaj) instalisane snage 10 kW AC (8 kWp DC) i predviđene godišnje proizvodnje 9,2 MWh, čiji su tehničko-energetski parametri dati u Prilogu 1 i Prilogu 2 te dozvole za rad. Tačkom 4.2. dozvole propisano je da je imalac dozvole obavezan zaključiti ugovore u skladu sa zakonom, Opštim uslovima za isporuku električne energije i drugim podzakonskim aktima. Tačkom 4.14. dozvole propisano je da je imalac dozvole obavezan dostaviti FERK-u izvještaje, u skladu sa pravilnikom o izvještavanju.

U vezi sa navedenim, FERK je proveo postupak nadgledanja rada imaoaca dozvole „EKO-SAN“ d.o.o. Sarajevo, te je 22.12.2022. godine donio Rješenje broj 06-13-5-1232-9/22, kojim je istom naloženo poduzimanje određenih mjera, u skladu sa uslovima izdate dozvole. Imaocu dozvole „EKO-SAN“ d.o.o. Sarajevo je naloženo:

- da u roku od 30 dana od dana prijema tog rješenja uskladi tehničke karakteristike opreme i uređaja proizvodnih objekata solarna fotonaponska elektrana „O.Š. Meša Selimović“ i solarna fotonaponska elektrana „Bijela ploča“ sa izdatom dozvolom za rad ili da pokrene postupak izmjene i dopune dozvole za rad, te da nakon isteka datog roka informacije o poduzetim aktivnostima dostavi FERK-u,
- da u roku od 30 dana od dana prijema tog rješenja dostavi na uvid važeći ugovor o otkupu električne energije zaključen sa Operatorom za obnovljive izvore energije i

- efikasnu kogeneraciju ili sa nekim od licenciranih snabdijevača električnom energijom, za solarnu fotonaponsku elektranu „Bijela ploča“,
- da sve ugovore, koji su zaključeni za proizvodne objekte solarna fotonaponska elektrana „O.Š. Meša Selimović“ i solarna fotonaponska elektrana „Bijela ploča“, uskladi sa izdatom dozvolom za rad u smislu odobrene priključne snage, a koja je navedena u elektroenergetskoj saglasnosti,
  - da nastavi redovno dostavljati FERK-u sve finansijske i tehničke podatke, na propisanim obrascima i u rokovima definisanim važećim Pravilnikom o izvještavanju za imaoce dozvola za snabdijevanje električnom energijom – dozvola II reda, nezavisne i kvalifikovane proizvođače i Operatora za OIEiEK, a u cilju ispunjenja obaveza koje su propisane Zakonom o električnoj energiji u Federaciji Bosne i Hercegovine i Dozvolom za rad za proizvodnju električne energije broj 06-03-580/22/14,
  - da redovno dostavlja planove proizvodnje za proizvodni objekt solarna fotonaponska elektrana „O.Š. Meša Selimović“ i solarna fotonaponska elektrana „Bijela ploča“ za narednu godinu i to do 30.09. tekuće godine,
  - da bez odlaganja obavijesti FERK ukoliko zbog vanrednih okolnosti dođe do nabavke nove opreme na postojećim proizvodnim objektima, koja se koristi za proizvodnju električne energije, kao i o vrijednosti te opreme,
  - da sve izvještaje dostavlja u formi tabela iz važećeg Pravilnika o izvještavanju za imaoce dozvola za snabdijevanje električnom energijom – dozvola II reda, nezavisne i kvalifikovane proizvođače i Operatora za OIEiEK kao i skenirano u PDF formatu sa pečatom i potpisom odgovornog lica.

Imalac dozvole „EKO-SAN“ d.o.o. Sarajevo nije izvršio mjere koje su mu naložene Rješenjem broj 06-13-5-1232-9/22 od 22.12.2022. godine, niti je dostavio dokumentaciju i obrazloženja u vezi sa tim.

Zbog navedenog, u skladu sa članom 42. stav (2) i članom 47. tačka a) Pravilnika za izdavanje dozvola FERK je imaoocu dozvole „EKO-SAN“ d.o.o. Sarajevo 08.02.2023. godine pod brojem 06-13-1-327-1/23 uputio Opomenu, kojom je istom ostavljen rok od osam dana od prijema opomene da postupi po tačkama 3.1., 4.2. i 4.14. izdate Dozvole za rad za proizvodnju električne energije broj 06-03-580/22/14 i po Rješenju broj 06-13-5-1232-9/22 od 22.12.2022. godine, odnosno:

- da uskladi tehničke karakteristike opreme i uređaja proizvodnih objekata solarna fotonaponska elektrana „O.Š. Meša Selimović“ i solarna fotonaponska elektrana „Bijela ploča“ sa izdatom dozvolom za rad ili da pokrene postupak izmjene i dopune dozvole za rad, te da nakon isteka datog roka informacije o preduzetim aktivnostima dostavi FERK-u,
- da dostavi na uvid važeći ugovor o otkupu električne energije zaključen sa Operatorom za obnovljive izvore energije i efikasnu kogeneraciju ili sa nekim od licenciranih snabdijevača električnom energijom, za solarnu fotonaponsku elektranu „Bijela ploča“,
- da dostavi informacije o ispunjenju obaveze da sve ugovore, koji su zaključeni za proizvodne objekte solarna fotonaponska elektrana „O.Š. Meša Selimović“ i solarna fotonaponska elektrana „Bijela ploča“, uskladi sa izdatom dozvolom za rad u smislu odobrene priključne snage, a koja je navedena u elektroenergetskoj saglasnosti.

U istoj opomeni imalac dozvole je upućen da će FERK, u slučaju da isti ne otkloni navedene nedostatke u datom roku, pokrenuti postupak oduzimanja predmetne dozvole u skladu sa članom 42. stav (3) Pravilnika za izdavanje dozvola.

Imalac dozvole „EKO-SAN“ d.o.o. Sarajevo nije u ostavljenom roku postupio po navedenoj opomeni, niti je u FERK dostavio bilo kakvo obrazloženje vezano za navode iz iste.

Na osnovu naprijed navedenog FERK je utvrdio sljedeće:

Prilikom izdavanja Dozvole za rad za proizvodnju električne energije broj 06-03-580/22/14 „EKO-SAN“ d.o.o. Sarajevo, FERK je postavio određene uslove imaoću dozvole, u skladu sa ovlasti iz člana 87. Zakona o električnoj energiji u Federaciji Bosne i Hercegovine. Međutim, suprotno postavljenim uslovima u tački 3.1., 4.2. i 4.14. dozvole za rad „EKO-SAN“ d.o.o. Sarajevo nije:

- uskladio tehničke karakteristike opreme i uređaja proizvodnih objekata solarna fotonaponska elektrana „O.Š. Meša Selimović“ i solarna fotonaponska elektrana „Bijela ploča“ sa izdatom dozvolom za rad niti je pokrenuo postupak izmjene i dopune dozvole za rad, kao ni nakon isteka datog roka informacije o preduzetim aktivnostima nije dostavio FERK-u,
- dostavio na uvid važeći ugovor o otkupu električne energije zaključen sa Operatorom za obnovljive izvore energije i efikasnu kogeneraciju ili sa nekim od licenciranih snabdijevača električnom energijom, za solarnu fotonaponsku elektranu „Bijela ploča“,
- dostavio informacije o ispunjenju obaveze da sve ugovore, koji su zaključeni za proizvodne objekte solarna fotonaponska elektrana „O.Š. Meša Selimović“ i solarna fotonaponska elektrana „Bijela ploča“, uskladi sa izdatom dozvolom za rad u smislu odobrene priključne snage, a koja je navedena u elektroenergetskoj saglasnosti.

Kako imalac dozvole nije otklonio sve nedostatke navedene u Opomeni broj 06-13-1-327-1/23 od 08.02.2023. godine, stekli su se uslovi za oduzimanje dozvole u skladu sa članom 21. stav (1) tačka 9) i članom 87. stav (2) Zakona o električnoj energiji u Federaciji Bosne i Hercegovine, te članom 42. stav (1) tačka b) i tačka c) i članom 42. stav (3) Pravilnika za izdavanje dozvola, a slijedom toga i uslovi za oduzimanje statusa kvalifikovanog proizvođača istom imaoću dozvole u objektu solarne fotonaponske elektrane „O.Š. Meša Selimović“ i objektu solarne fotonaponske elektrane „Bijela ploča“ u skladu sa članom 21. tačka a) Pravilnika o sticanju statusa kvalifikovanog proizvođača električne energije.

Dalje, Odlukom o privremenoj regulatornoj naknadi za imaoće dozvola za obavljanje elektroprivrednih djelatnosti i imaoća dozvole za rad Operatora za OIEiEK za 2023. godinu broj 08-11-1613-1/22 od 13.12.2022. godine („Službene novine Federacije BiH“ broj 102/22), „EKO-SAN“ d.o.o. Sarajevo je, kao imaoću Dozvole za rad za proizvodnju električne energije broj 06-03-580/22/14, u tački 485. utvrđen fiksni dio privremene regulatorne naknade za 2023. godinu u iznosu od 300,00 KM i varijabilni dio privremene regulatorne naknade za 2023. godinu u iznosu od 0,00 KM, odnosno ukupna privremena regulatorna naknada za 2023. godinu u iznosu od 300,00 KM. U skladu sa članom 9a. Pravilnika o metodologiji i načinu obračuna regulatornih naknada za imaoće dozvola, imaoćima dozvola za obavljanje elektroprivrednih djelatnosti i Operatoru za OIEiEK, kojima se vrši oduzimanje dozvole, iznos regulatorne naknade preračunava se pojedinačnim rješenjem u skladu sa periodom važenja dozvole u tekućoj godini. Obzirom na navedeno, regulatorna naknada za 2023. godinu je preračunata i ista sada iznosi 55,89 KM. Pošto je „EKO-SAN“ d.o.o. Sarajevo izmirilo obaveze u iznosu od 150,00 KM kao prvi dio privremene regulatorne naknade za 2023. godinu, **više uplaćena regulatorna naknada u iznosu od 94,11 KM biće vraćen na transakcijski račun „EKO-SAN“ d.o.o. Sarajevo, o čemu će se ispostaviti posebno obavještenje.**

Slijedeći navedeno, te obzirom da se stanje stvari može utvrditi na osnovu službenih podataka kojima FERK raspolaže, iz kojih razloga je postupak proveden bez objave obavještenja za javnost i bez održavanja javne rasprave u skladu sa članom 43. stav (2) Pravilnika za izdavanje dozvola, odlučeno je kao u dispozitivu rješenja.

**POUKA O PRAVNOM LIJEKU:**

Protiv ovog rješenja može se tužbom pokrenuti upravni spor kod Kantonalnog/Županijskog suda u Mostaru u roku od 30 dana od dana prijema rješenja. Tužba se predaje sudu direktno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

**v.d. PREDSEDNIKA FERK-a**  
**Mile Srdanović, s.r.**